



## IZVJEŠTAJ

### O ZVANIČNOJ POSJETI PREDSEDAVAJUĆEG PREDSTAVNIČKOG DOMA PSBiH MILORADA ŽIVKOVIĆA, ZAMJENIKA PREDSEDAVAJUĆEG PREDSTAVNIČKOG DOMA PSBiH BERIZA BELKIĆA I POSLANIKA U PREDSTAVNIČKOM DOMU PSBiH VINKA ZORIĆA PARLAMENTU FINSKE Helsinki, 25. и 26.mart,2010.

Delegacija Parlamentarne skupštine BiH, u kojoj su bili: **Milord Živković**, predsjedavajući Predstavničkog doma PSBiH, **Beriz Belkić**, zamjenik predsjedavajućeg Predstavničkog doma PSBiH, **Vinko Zorić**, poslanik u Predstavničkom domu PSBiH i zamjenik predsjedavajuće Grupe prijateljstva PSBiH za saradnju s Finskom, **Igor Bunić**, savjetnik predsjedavajućeg Predstavničkog doma PSBiH, i **Jelena Rajaković** iz Sektora za međunarodne odnose i protokol PSBiH, boravila je u posjeti finskom parlamentu od 24. do 26.3.2010. Svim sastancima prisustvovao je Ambasador BiH u Štokholmu **Darko Zelenika**.

Tokom boravka u Helsinkiju rukovodstvo PDPSBiH sastalo se sa g.**Saulijem Niinistom**, predsjednikom finskog parlamenta, **Aleksandrom Stubbom**, ministrom vanjskih poslova Finske, **Seppom Kaariainenom**, prvim zamjenikom predsjednika Parlamenta Finske, **Kimmom Sasijem**, predsjedavajućim Odbora za ustav Parlamenta Finske, **Juhom Korkea-aho**, predsjedavajućim Odbora za odbranu Parlamenta Finske, **Markkuom Laukkanenom**, zamjenikom predsjedavajućeg Odbora za vanjsku politiku Parlamenta Finske, i **Jarmom Vuorinenom**, zamjenikom generalnog sekretara Parlamenta Finske.

Tokom razgovora predsjedavajući PDPSBiH Milorad Živković, zamjenik predsjedavajućeg PDPSBiH Beriz Belkić i poslanik u PDPSBiH Vinko Zorić izrazili su zadovoljstvo ovom posjetom, koja predstavlja doprinos daljnjem jačanju parlamentarne i bilateralne saradnje dvije prijateljske zemlje.

Izražena je zahvalnost Finskoj na njenoj podršci za članstvo BiH u Vijeću sigurnosti UN-a, te naglašeno da će BiH sa svoje strane podržati predstojeću kandidaturu Finske za nestalnu članicu Vijeća sigurnosti UN-a u periodu 2013.-2014. godina.

Sagovornicima je prenesena poruka da je BiH ispunila sve uslove iz Mape puta za liberalizaciju viznog režima, na osnovu čega BiH očekuje od Evropske komisije i EU liberalizaciju viznog režima, od 1.7.2010., te u je tom kontekstu zatražena podrška Finske.

Naglašen je uspjeh reforme odbrane u BiH, te spremnost BiH za dobivanje MAP statusa pri NATO-u. Konstatirano je da se napretkom prema NATO-u ostvaruje veća sigurnost u BiH, što doprinosi i regionalnoj sigurnosti JIE. BiH je predala zahtjev za MAP status, što bi bilo veoma značajno za BiH. Ukazano je da uslovljavanje dobivanja tog statusa ustavnim reformama otežava put BiH.

Također je ukazano na značaj dobivanja vizne liberalizacije i MAP statusa pri NATO-u na unutrašnjopolitičkom planu, jer bi to svakako relaksiralo političku situaciju. Uživanje bezviznog režima omogućilo bi građanima BiH da putuju i uvjere se u način života u zemljama EU, što bi imalo pozitivne efekte.

Svaki pozitivni korak prema NATO-u znači manje potrebe za međunarodnim sigurnosnim snagama, a svaki pomak prema EU podrazumijeva manje potrebe za postojanjem OHR-a. BiH je opredijeljena za pružanje svog doprinosa u operacijama uspostave i održavanja mira i sigurnosti u svijetu, putem različitih mirovnih operacija (npr. ISAF), te u borbi protiv međunarodnog terorizma i organiziranog kriminala.

Predstavljeni su način rada i funkcioniranja PSBiH, te aktuelne zakonodavne aktivnosti, a posebno rad na provođenju odluke Suda za ljudska prava, izmjenama i dopunama Ustava BiH i Izbornog zakona.

S obzirom na to da izbori treba da budu raspisani 4.5.2010., a održani 3.10.2010., ulažu se naponi za provođenje presude Suda putem izmjena postojećeg ustava. U tom smislu donesen je akcioni plan, uspostavljene odgovarajuće radne grupe za izradu prijedloga amandmana na Ustav i izmjene Izbornog zakona.

Sauli Niinisto, predsjednik finskog parlamenta, iskazao je zadovoljstvo sastankom i prilikom za razmjenu mišljenja dvije prijateljske zemalje. Kao članica EU, Finska podržava dalje proširenje EU i liberalizaciju viznog režima, što se odnosi i na BiH.

On se interesirao za iskustva BiH s evropskim investicionim institucijama i njihovoj ulozi u društveno-ekonomskom razvoju zemlje.

Alexander Sutubb, ministar vanjskih poslova Finske, zanimao se za predstojeće izbore, OHR, butmirski proces i izmjene Ustava.

Naglasio je da je, nažalost, prije svoje posjete BiH u februaru 2010. godine, bio veći optimista nego nakon posjete i obavljenih razgovora, jer nakon toga osjeća određeni pesimizam. U razgovorima u Sarajevu čuo je različite stavove i poglede na politička pitanja u BiH i različite reakcije prilikom njegovog govora u PSBiH. Navedeno ukazuje na jake podjele u BiH, te da je nacionalna retorika jaka.

Ocijenio je pozitivnim ostvareni napredak u primjeni Mape puta za liberalizaciju viznog režima, procesa koji Finska podržava. Sada se očekuje izvještaj Evropske komisije o ispunjavanju Mape puta za liberalizaciju viznog režima BiH. Nadaju se pozitivnoj ocjeni i davanju preporuke za ukidanje viznog režima za BiH.

On je istakao da misli da se, prema sadašnjim raspravama u Briselu, ne može mnogo očekivati od reformi u BiH prije oktobarskih izbora. Ukazao je na neracionalnu i skupu državnu organizaciju i administraciju, koja ima negativan uticaj na korupciju u zemlji. Stub je na kraju ocijenio da je proširenje najbolji instrument EU u jačanju demokratije i razvoja zemlje. Finska podržava daljnje proširenje EU dodajući kako smatra da EU nije kompletna dok se BiH ne nađe u njenom članstvu.

Seppo Kaariainen, prvi zamjenik predsjednika finskog parlamenta, podsjetio je da je pri donošenju odluke o uključivanju Finske u EU postojala mala razlika u glasanju finških državljana, a samim članstvom u EU nastupila je određena promjena u odnosu na raniju neutralnu poziciju Finske. Međutim, članstvom Finske u EU i eurozoni ostvareni su pozitivni rezultati i iskustva, a Finska je aktivna u radu EU.

Finska je članica PFP NATO-a i uspostavila je oružane snage prema standardima NATO-a. U Finskoj je donesena odluka da se u periodu od 2012. do 2015. godine neće tražiti članstvo u NATO-u. Sada su dvije trećine stanovništva protiv članstva u NATO-u, tako da to nije aktuelno pitanje u finskoj politici. Cilj je očuvanje dobrih odnosa s NATO-om i ostavljanje mogućnosti za buduće članstvo.

Kimmo Sasi, predsjedavajući Odbora za ustav Parlamenta Finske, izjavio je da dolazi u posjetu BiH 18.4.2010. te da se nada da će do tada biti završen dio aktivnosti na izmjeni Ustava i provođenju presude Suda za ljudska prava. Njegova poruka za BiH bit će da se moraju napraviti izmjene Ustava, mada razumije političke teškoće i složenost materije. Smatra da BiH mora biti sposobna da provode sve zakone, kao i direktive EU, pri čemu vlada treba da ima odgovarajuća ovlaštenja i odgovornosti.

Juha Korkeaoja, predsjedavajući Odbora za odbranu Parlamenta Finske, istakao je da u uređenju oružanih snaga Finska primjenjuje standarde NATO-a. Kao članica PFP NATO-a, Finska aktivno učestvuje u mirovnim operacijama, a finški državljani zadovoljni su sadašnjom situacijom: članstvom u EU i PFP NATO-a, te dobrim odnosima s Rusijom. Nakon 2015. godine bit će moguća i rasprava o članstvu u NATO-u.

Naglasio je da je upravo u toku rasprava o mirovnoj operaciji ISAF-a, te povećanju broja finških vojnika sa 145 na 195 ljudi (kao dijela Nordijskog kontingenta u Mazar al Sharifu, zajedno sa Šveđanima).

Izjavio je da se i u Finskoj trenutno razmatraju odgovarajuće ustavne reforme.

Finska ima stav da zemlje Zapadnog Balkana i BiH treba da uđu u EU i NATO. U tom smislu, značajno je da se ostvaruju koraci naprijed.

Markku Laukkanen, zamjenik predsjedavajućeg Odbora za vanjsku politiku Parlamenta Finske, interesirao se za bh. poglede na mirovnu operaciju Althea, postojanje OHR-a i butmirski proces.

On je istakao da Finska podržava proširenje EU na zemlje Zapadnog Balkana, pri čemu sve zemlje moraju ispuniti iste uslove, ali da se ostvareni rezultati ocjenjuju po zemljama pojedinačno. Većina zemalja, pa tako i BiH, treba da ostvari strukturalne reforme prije približavanja i ulaska u EU.

Jarmo Vuorinen, zamjenik generalnog sekretara finskog parlamenta, predstavio je način organiziranja, rada i funkcioniranja finskog parlamenta. Dogovoreno je da će posredstvom Ambasade BiH u Štokholmu biti dostavljena pisana informacija o finskim iskustvima i politici u planiranju i provođenju parlamentarne diplomatije i demokratije, posebno u utvrđivanju prioriteta u odnosima s drugim zemljama, posjetama, načinu i odgovornosti za donošenje odluka u vezi s tim.

Delegacija Predstavničkog doma PSBiH prisustvovala je i dijelu popodnevne rasprave finskog parlamenta, 25.3.2010. Tom prilikom predsjedavajući sesije najavio je bh. delegaciju, koja je pozdravljena aplauzom prisutnih poslanika.

Predsjedavajući PDPSBiH Milorad Živković uputio je poziv predsjedniku Parlamenta Finske Sauliju Niinistou te Odboru za odbranu Parlamenta Finske da posjete BiH, s ciljem razmjene iskustava i unapređenja saradnje.

Predsjednik Niinistou naglasio je da do sada nije imao priliku posjetiti BiH, te se pozitivno izrazio o tom prijedlogu.

Šef

Odjela za bilateralne odnose i protokol

Jelena Rajaković

Prilog:

- Program posjete

Dostaviti:

- Kolegiju Predstavničkog doma
- Kolegiju Doma naroda
- Komisiji za vanjske poslove Predstavničkog doma
- Komisiji sa vanjsku i trgovinsku politiku Doma naroda
- Zajedničkoj komisiji za evropske integracije

Prilog:

-Program posjete